

故也今次仍依辛酉己卯議俱用官尺為準體身長六丈一尺
舵長三丈一尺大桅長七丈二尺圓七尺五寸二桅長六丈五
尺圓六尺二寸然大桅舊式須足官尺八丈乃為中程今次如
式者既屢為鑿燬而長不及數與尾圓共小不滿四尺者又不
堪用故臨期倉皇不得已取兩木幫為合桅外以鐵箍束之然
回日遇颶風搖拽竟不免損裂之患乃知前人之必用全桅者
良有以也

夏子陽曰夫封舟費之大者也然以終王事義實在焉市井之

徒何知好義以嚮其利者為有德故費在官則競為饗費在民
則朋為匿使臣者載義而行者也義不能徇人以欲則任怨徇
之不可而拮据卒瘁躬為經畫也則任勞經之而不得柄之必
須以日矣積日不能無積費誰實為之而且以為口實也則任
諂此三任者義之所不能辭也使臣所遇之不獲已也而要之
以共王之大義則必有任其責者耳

用人

任事在人授事在擇人海艘之役其需人也多矣始而營之惟

